

Vijeće ministara BiH nije čak ni raspravljalo o Zakonu o sudu Bosne i Hercegovine

Visoki predstavnik Wolfgang Petritsch izražava svoju zabrinutost činjenicom da Vijeće ministara nije stavilo Zakon o sudu Bosne i Hercegovine na dnevni red svoje današnje sjednice.

Time što bi osigurao da postoji pravna ustanova koja može rješavati pitanja u vezi sa vanjskom trgovinom, što po Ustavu potpada pod nadležnosti države, Sud BiH bi stekao povjerenje mogućih investitora. Sud bi također predstavljao instituciju u kojoj bi građani Bosne i Hercegovine mogli tražiti pravnu pomoć u vezi sa pitanjima poput pasosa, ličnih karata, nelegalne imigracije, trgovine ljudima i međujentitetskog kriminala. Ova pitanja, prema Ustavu, također spadaju u nadležnosti države Bosne i Hercegovine. Nacrt zakona osigurava da se Sud BiH neće uplitati u nadležnosti entiteta.

I pored toga što su ga Visoki predstavnik i njegov Prvi zamjenik Ralph Johnson ove sedmice lično informirali o važnosti ovog Zakona, novi predsjedavajući Vijeća ministara Martin Raguz nije čak ni stavio Nacrt zakona na dnevni red sjednice Vijeća ministara. Ovo se dogodilo uprkos tome što je Nacrt odobrila Radna grupa Ministarstva civilnih poslova i komunikacija koja je u sastavu Vijeća ministara.

Zabrinjavajuća situacija u ekonomiji države ukazuje na to koliko je važno privući investicije u BiH. Svako odlaganje u donošenju ovog Zakona dalje odlaze dolazak stranog kapitala u BiH. Phare Program Evropske unije je stavio obećanje u iznosu od 1 miliona Eura kao pomoć osnivanju ove institucije. Odlaganjem usvajanja ovog Zakona za narednu godinu ova sredstva biće izgubljena. To znači da će osnivanje Suda biti odloženo, što će već razočanim donatorima ponovo uputiti signal da Bosna i Hercegovina nije zainteresirana za uvođenje reformi. Zakon predstavlja i uvjet za ulazak BiH u Vijeće Evrope.

Visoki predstavnik smatra da je krajnje vrijeme da zajedničke institucije počnu da djeluju u interesu građana koje bi trebale predstavljati. Ankete ukazuju na to da građane više interesuje posao nego nacionalistička retorika, a sve stranke su izjavile da žele poboljšati izuzetno lošu ekonomsku situaciju u Bosni i Hercegovini. Ovo je pitanje na koje predstavnici Bosne i Hercegovine mogu pokazati da je ta izjava predstavljala više od praznog obećanja.